

告諸弟子清慎汝心守護身口恒以四等濟於衆生以道寶之慧恩施一切如佛教誡必得度世弟子諸來會者聞佛說經歡喜奉行作禮而去

佛說四輩經

佛說當來變經

西晉三藏法師竺法護譯

聞如是一時佛在舍衛國祇樹給孤獨園與大比丘衆俱比丘五百及諸菩薩爾時世尊告諸比丘將來之世當有比丘因有一法不

從法化令法毀滅不得長益何謂為一不護禁戒不能守心不修智慧放逸其意唯求善名不順道教不肯勤慕度世之業是為一事令法毀滅佛告比丘復有二事令法毀滅何謂為二一不護禁戒不攝其心不修智慧畜妻養子放心恣意賈作治產以相供活二伴黨相著憎奉法者欲令陷墮故為言議謂之諛諂內私犯惡外揚清白是為二事令法毀滅佛告比丘復有三事令法毀滅何謂為三一既不護戒不能攝心不修經義二自讀文

字不諦句逗以上著下以下著上頭尾顛倒不能解了義之所歸自以為是三明者訶之不從其教反懷瞋恨謂相嫉妬識義者少多不別理咸自為是是為三事令法毀滅佛告比丘復有四事令法毀滅何謂為四一將來比丘已捨家在空閑處不修道業二喜遊人間憤鬧之中行來比丘談言求好袈裟五色之服三高望遠視以為綺飾自以高德無能及者以雜碎之智比日月之明畜已四不攝三事不護根門行婦女間宣文飾辭多言合

偶以動人心使清變濁身行荒亂正法廢遲是為四事令法毀滅佛告比丘復有五事令法毀滅何謂為五或有比丘本以法故出家修道廢深經教十二因緣三十七品方等深妙玄虛之慧智度無極善權方便空無相願至化之節二反習雜句淺末小經世俗行故三者經典亂道之原好講此業易解世事趣得人心令其歡悅因致名聞四新聞法人淺解之士意用妙快深達之人不用為佳天龍鬼神不以為喜心懷悵憾口能發言大法欲

滅故使其然捨妙化法及宣雜句諸天流淚
速逝而去五由說是正法稍稍見捨無精修
者是為五事今法毀滅佛告比丘吾滅度後
有此邪事十四之亂令法毀滅一何痛哉若
有比丘欲諦學道棄捐綺飾不求名聞質料
守真宣傳正經佛之雅典深法之辭不用多
言案其本經不捨正句希言屢中不失佛意
麤衣趣食得美不甘得麤不惡衣食好醜隨
施者意不以瞋喜護身口意守諸根門不違
佛教壽命甚短恍惚已過如夢所見覺不知

處三塗之難不可稱計勤修佛法猶救頭然
五戒十善六度無極四等四恩智慧善權咸
可修行雖復後生不值佛世出家為道學不
唐捐平其本心愍哀一切十方蒙恩佛說如
是諸比丘悲喜前自歸佛作禮而去

佛說當來變經